

**ODLUKA**  
**o sigurnosti i organizaciji saobraćaja na području općine Kalesija**  
(NACRT)

Kalesija, januara 2026. godine

Na osnovu člana 2. Zakona o osnovama sigurnosti saobraćaja na putevima u Bosni i Hercegovini („Službeni glasnik BiH“, broj : 6/06, 75/06, 44/07, 84/09 i 48/10-dr zakon, 18/13, 8/17, 89/17, 9/18, 46/23 i 88/23), člana 8. i 15. Zakona o principima lokalne samouprave u Federaciji Bosne i Hercegovine („Službene novine F BiH“, broj 49/06 i 51/09) i člana 42. Statuta Općine Kalesija („Službeni glasnik Općine Kalesija, broj 10/07, 7/08, 10/11, 3/12 i 6/13), Općinsko vijeće Kalesija na sjednici održanoj dana \_\_\_\_\_ 2026. godine, d o n i j e l o j e

## **O D L U K U**

### ***o sigurnosti i organizaciji saobraćaja na području općine Kalesija***

#### **I – OPĆE ODREDBE**

##### **Član 1.**

Ovom Odlukom propisuju se uvjeti i pravila sigurnosti i organizacije saobraćaja na javnim saobraćajnim površinama u općini Kalesija (u daljem tekstu: Odluka), te mjere za njihovo provođenje.

##### **Član 2.**

Javnim saobraćajnim površinama u smislu ove Odluke smatraju se: lokalne i nerazvrstane ceste, ulice, trgovi, javni prijelazi, trotoari, biciklističke staze, mostovi, podvožnjaci, nadvožnjaci, tuneli, parkirališta, ostavilišta za bicikle i bicikle sa pomoćnim motorom, javne garaže, podhodnici, nadhodnici, stajališta i terminali javnog gradskog saobraćaja i slične površine.

Pod užim gradskim područjem podrazumijevaju se slijedeće ulice: Ulica Patriotske lige, Ulica Žrtava genocida u Srebrenici, Ulica Mehmeda Husića, Ulica Dževada Džafića, Ulica 25. novembra ZAVNOBiH-a, Ulica 23. maja, Ulica žena boraca Armije BiH, Ulica Kalesijskog odreda, Ulica Kalesijskih brigada, Ulica Senada Požegića, Ulica šehida, Ulica Sarajevska, Ulica zlatnih ljiljana, Ulica Muhamedage Hadžiefendića, Ulica Senada Hodžića Mehdina, Ulica Kapetana Hajrudina Mešića-Hajre, Ulica Halisijska, Ulica Braće Bukvarević , Ulica 12. marta, Ulica Huse Huremovića, Ulica Halila Jahića Pancira, Ulica Rašida Durakovića, Ulica Mirsada Loznice, Ulica Rašida Durakovića, Požarni put do objekta MŠC Kalesija, Slijepa ulica pored UR „LIPA“ između Tržnog centra i stadiona FK „Bosna“.

##### **Član 3.**

Saobraćaj na javnim saobraćajnim površinama dopušten je svakom pod jednakim uvjetima u granicama propisanim zakonom i ovom Odlukom.

##### **Član 4.**

Svi subjekti koji određuju i provode saobraćajnu politiku dužni su stalno osiguravati uvjete za sigurno i nesmetano odvijanje saobraćaja.

#### **II – ORGANIZACIJA I REGULACIJA SAOBRAĆAJA**

##### **Član 5.**

Na osnovu mjera iz ove Odluke utvrđuje se režim odvijanja saobraćaja na užem

gradskom području definiran saobraćajnim projektom ili drugim aktom.

Saobraćaj na javnim cestama van užeg gradskog područja definira se saobraćajnim projektima tih cesta, ovom Odlukom ili u potrebi hitnih okolnosti Rješenjem nadležne općinske službe .

Poslove praćenja organizacije i regulacije saobraćaja vrši nadležna služba za saobraćaj općine Kalesija ( u daljem tekstu nadležna općinska služba).

Izmjene i dopune saobraćajnog projekta osigurava-obezbjeđuje Općinski načelnik, na prijedlog nadležne općinske službe.

### **Član 6.**

Tehničkom regulacijom saobraćaja u smislu ove Odluke smatra se postavljanje, uklanjanje, zamjena i održavanje saobraćajne signalizacije (horizontalne, vertikalne i svjetlosne) i opreme na javnoj cesti ili ulici.

Tehničku regulaciju horizontalne, vertikalne i svjetlosne saobraćajne signalizacije vrši nadležna općinska služba koje upravljaju putevima na osnovu saobraćajnog projekta.

Saobraćajni znakovi i oprema na putu se postavljaju i održavaju na osnovu projektnog rješenja ili rješenja nadležne općinske službe.

### **Član 7.**

Nadležna općinska služba može privremeno zabraniti ili ograničiti saobraćaj na lokalnoj cesti ili ulici koja je u nadležnosti općine ako se izvode radovi na rekonstrukciji ili popravci javne ceste, ulice, objekata i instalacija uz cestu ili ulicu i ako se isti ne mogu izvesti bez obustave saobraćaja.

Nadležna služba općine će aktom kojim odobrava obustavu saobraćaja, odrediti vrijeme u kojem se saobraćaj obustavlja u zavisnosti od opterećenja saobraćaja, te potrebe za izvođenje planiranih radova.

Za radove redovnog održavanja nije potrebno izdavati saglasnost nadležne općinske službe o posebnom režimu odvijanja saobraćaja.

Nadležna služba općine može privremeno zabraniti ili ograničiti saobraćaj i u slučajevima odvijanja kulturnih, zabavnih, sportskih, tehničkih smotri, sajмова poljoprivrednih proizvoda i drugih društveno značajnih manifestacija od značaja za promociju općine Kalesija.

O namjerama privremene zabrane nadležna općinska služba obavještava nadležnu policijsku upravu koja odgovarajućom naredbom određuje zabranu ili ograničenje saobraćaja.

Za osiguranje zabrane ili ograničenja odgovoran je subjekt koji je tražio zabranu ili ograničenje saobraćaja (organizator manifestacije) koristeći se odgovarajućim znacima, fizičkim preprekama kao i dežurnim redarima sa odgovarajućim uniformama, uočljivim prslucima i markirnim trakama na ruci.

### **Član 8.**

Nadležna općinska služba je dužna u okviru svojih nadležnosti voditi računa:

1. o tehničkoj regulaciji saobraćaja na ulicama užeg gradskog područja,
2. o ispravnosti saobraćajne signalizacije i opreme na ulicama užeg gradskog

područja i

3. o stanju i održavanju saobraćajnih površina užeg gradskog područja. Nadležna služba je dužna godišnje izvještavati Općinsko vijeće o stanju saobraćajnih objekata na ulicama užeg gradskog područja.

#### **Član 9.**

Nadležna Policijska stanica u okviru zakonskih ovlaštenja prati stanje sigurnosti saobraćaja na području općine, preuzima mjere sigurnog odvijanja saobraćaja, sigurnosti regulacije saobraćaja i druge mjere iz njene nadležnosti.

Nadležna Policijska stanica dužna je godišnje izvještavati Općinskog načelnika i Općinsko vijeće o stanju sigurnosti saobraćaja na području općine.

#### **Član 10.**

Osim propisanih saobraćajnih znakova na cesti je dozvoljeno postavljanje i drugih znakova, informacija, reklamnih panoa i natpisa uz odgovarajuću naknadu propisanu odlukom o komunalnim taksama, koju provodi nadležna služba za komunalne poslove.

Postavljanje znakova, informacija, reklamnih panoa i natpisa, provodeći propisan postupak, odobrava Služba nadležna za prostorno planiranje.

#### **Član 11.**

Prilikom zauzimanja javnih saobraćajnih površina moraju biti zadovoljeni sljedeći saobraćajni uvjeti i ograničenja:

1. širina slobodnog prolaza za pješake mora iznositi najmanje 1,6 metara ili i manju širinu definiranu projektom
2. ne smije se ugrožavati ugao preglednosti na raskršću, protočnost ili sigurnost drumskog ili pješačkog saobraćaja.

### **III – KRETANJE PO JAVNIM SAOBRAĆAJNIM POVRŠINAMA**

#### **Član 12.**

Ako pješaci po ulicama i putevima užeg gradskog područja nose predmete duže od 3 (tri) metra, ti predmeti moraju biti na krajevima vidno obilježeni, uočljivom maramom ili slično.

#### **Član 13.**

Dječija kolica u kojima se prevoze djeca kao i lica koja voze dječija kolica, te invalidna lica koja se kreću u invalidskim kolicima kao i lica koja voze invalidna lica u kolicima moraju se kretati trotoarima ili po drugim površinama namjenjenim kretanju pješaka.

#### **Član 14.**

Učesnici u saobraćaju prema invalidima, slijepim i nemoćnim licima, te djeci, kao i licima koja prate ili prevoze invalide i djecu se moraju kretati prilagođenom brzinom i trebaju postupati sa najvećom pažnjom.

## **1.1 Brzina kretanja**

### **Član 15.**

Na užem gradskom području i drugim naseljenim mjestima općine vozila se ne smiju kretati većom brzinom od 50 km/h, odnosno brzinom većom od dozvoljene postavljenim saobraćajnim znakom za cijelo naselje ili njegov dio.

### **Član 16.**

Početak i završetak naseljenog mjesta, kao i ograničenja brzina kretanja vozila moraju se obilježiti odgovarajućim saobraćajnim znakom.

### **Član 17.**

Prvenstvo prolaza vozila određuje se u načelu u ulicama koje predstavljaju osnovu saobraćajne mreže.

Ulice koje se obilježavaju kao ceste s prvenstvom prolaza u odnosu na bočne ulice su:

Ulica Patriotske lige  
Ulica Senada i Sakiba Tubića,  
Ulica Dževada Džafića,  
Ulica žrtava Genocida u Srebrenici,  
Halisijska ulica,  
Ulica Kapetana Hajrudina Mešića-Hajre,  
Ulica Muhamedage Hadžiefendića i  
Ulica Senada Požegića.

Bočne ulice u kontaktu sa ulicama s prvenstvom prolaza moraju biti opremljene znakom obaveznog zaustavljanja („stop“) ili znakom koji ukazuje da se vozač uključuje u ulicu s prvenstvom prolaza, u svemu prema važećim pravilnicima.

U slučajevima kada ukrštanje ulica nije opremljeno znacima koji ukazuju na prvenstvo prolaza ili znakom obaveznog zaustavljanja („stop“), vozači moraju primjenjivati i poštovati prvenstvo prolaza vozila koja mu dolaze sa desne strane.

### **Član 18.**

Ulice u kojima se saobraćaj odvija u jednom smjeru su:

Ulica Trg šehida između objekta MUP-a i gradske džamije lijevo između Lovačkog doma i Zgrade Općinskog suda.

## **1.2 Ograničenja saobraćaja**

### **Član 19.**

U pješačkoj zoni koja je označena odgovarajućom saobraćajnom signalizacijom zabranjeno je kretanje vozila.

### **Član 20.**

Zabranjen je saobraćaj teretnim motornim vozilima u sljedećim ulicama:

1. Ulica Patriotske lige osim dostavnih vozila i
2. Ulica Oslobođilaca Kalesija osim dostavnih vozila
3. Ulica žrtava Genocida u Srebrenici

Za kretanje dostavnih vozila u ulicama u kojima je zabranjen saobraćaj teretnim motornim vozilima iz stava 1. tačka 1, 2 i 3 ovog člana vlasnici dostavnih vozila moraju kod nadležne općinske službe pribaviti odobrenje za kretanje dostavnim teretnim vozilima u zonama zabrane na saobraćajnicama općine Kalesija.

Ovom odlukom utvrđuje se iznos naknade za dostavna vozila prema dopuštenoj nosivosti:

- do 500kg: 10KM mjesečno,
- od 500 kg-2t: 20KM mjesečno
- od 2t-5t: 30 KM mjesečno
- preko 5t: 50KM mjesečno

#### **Član 21.**

Požarni put do objekta MŠC Kalesija se može koristiti za saobraćaj prilikom korištenja Parkinga za uposlenike MŠC Kalesija kao i za dostavna vozila. Na površini požarnog puta ne smije se vršiti zaustavljanje niti parkiranje vozila.

#### **Član 22.**

Zabranjeno je na svim saobraćajnim površinama ostavljati oštećena, dotrajala ili neregistrirana vozila.

#### **Član 23.**

Vuča neispravnih vozila propisana Zakonom na užem gradskom području, izuzev Ulicom Mehmeda Husica, Ulicom Dževada Džafića i Ulicom Senada i Sakiba Tubića, Ulicom Kalesijskog odreda, Ulicom Kalesijskih brigada, Ulicom Senada Hodžića Mehdina te Halisijskom ulicom nije dozvoljena u vremenu od 06h do 08h i od 14h do 16h sati.

#### **Član 24.**

Policijska stanica odredit će pravac kretanja i mjesta na kojima se mogu zadržavati vozila koja vrše prevoz opasnih materija. Vozila koja prevoze opasne materije ne smiju se zadržavati na području općine suprotno stavu 1. ovog člana.

#### **Član 25.**

Na dijelu užeg gradskog područja nije dozvoljeno kretanje zaprežnim vozilima, kao i gonjenje stoke u krdu, stada ili pojedinačno.

Izuzetno od stava 1. može se dozvoliti kretanje vučenih fijakera i drugih tradicionalnih bosanskih vozila prilikom kulturnih i drugih manifestacija uz odobrenje nadležne općinske službe.

#### **Član 26.**

Ulicama u kojima je za sve ili pojedine vrste vozila zabranjen saobraćaj mogu se kretati:

1. vozila za hitnu pomoć, vatrogasna vozila, policijska vozila, vozila pod pratnjom, samo kad posebnim uređajima daju svjetlosne i zvučne znakove,
2. vozila inspeksijskih organa kada vrše inspeksijski pregled,
3. vozila invalida sa oštećenjem donjih ekstremiteta, ako im to vozilo služi kao pomagalo u kretanju,

4. vozila za prijevoz posmrtnih ostataka,
5. vozila komunalnih organizacije koja se angažuju za održavanje kanalizacije, vodovoda, električnih, telefonskih instalacija, instalacija daljinskog grijanja, održavanje čistoće u vremenu od 22h do 09h sati, vozila televizije i poštanska vozila, kada obavljaju radnje za koje su namjenjena,
6. vozila za pružanje tehničkih pomoći na putevima i
7. vozila za slučaj hitnih intervencija.
8. vozila ptt i brze pošte kada vrše preuzimanje i dostavljanje pošiljki
9. vozila za dostavu kada vrše snabdijevanje domaćinstava, trgovinskih i drugih organizacija u vremenu od 06 do 10 sati i od 16 do 20 sati , uz posjedovanje dokaza o isporuci robe ili vršenja usluga licu koje u navedenom prostoru posjeduje stambeni ili poslovni prostor (ugovor, narudžbenica i sl.)
10. vozila stanara i zaposlenika, uz dokaz o pravu korištenja poslovnog prostora, garaže, stana ili dokaz o radnom odnosu.

Vozila iz stava 1. tačka 1. do 6. ovog člana moraju biti obilježena nazivom firme, organa ili ustanove, a korisnici vozila iz 9. i 10. ovog članamoražu posjedovati valjane dokaze o vršenju isporuka roba i usluga (ugovor, narudžbenica i sl.), pravu korištenja poslovnih prostora, garaža ili stanova (Rješenje Općinskog suda Kalesija, kupoprodajniugovor, ugovor o zakupu i sl.) i istaknuti ih na vidno mjesto.

#### **Član 27.**

Kretanje autobusa na kantonalnim, federalnim, međuentitetskim i međunarodnim autobuskim linijama dozvoljeno je do i od autobuske stanice Kalesija u Ulici Patriotske lige lokacija RK Bingo i lokacija MŠC Kalesija kao i Ulicom žrtava genocida u Srebrenici sa polaskom ispred PO Bigsim d.o.o. Kalesija.

#### **Član 28.**

Autobusi koji saobraćaju na prigradskim općinskim, kantonalnim, federalnim, međuentitetskim i međunarodnim autobuskim linijama, kao i autobusi koji vrše vanlinijski prijevoz putnika i taksi prijevoznici, ne smiju stajati na stajalištima javnog gradskog prijevoza.

Izuzetno, nadležna služba može odobriti da autobusi sa pojedinih prigradskih općinskih linija mogu stajati na pojedinim stajalištima javnog gradskog prijevoza i na drugim mjestima.

### **IV - ZAUSTAVLJANJE I PARKIRANJE VOZILA**

#### **Član 29.**

Zaustavljanje i parkiranje motornih vozila na javnim cestama i ulicama u naseljenim mjestima može se vršiti samo na način određen propisima o sigurnosti saobraćaja na putevima i ovom Odlukom.

#### **Član 30.**

Na području užeg gradskog područja zabranjeno je parkiranje autobusa, teretnih vozila preko 2,5 tone najveće dozvoljene mase, kamp prikolica kao i teretnih vozila fizičkih lica koja vrše javni prijevoz stvari i prijevoz za vlastite potrebe, osim na

posebnim mjestima (parkiralištima) koje odredi nadležna služba.

### **Član 31.**

Za parkiranje vozila na području užeg gradskog područja utvrđuju se javna parkirališta.

Javno parkiralište je označena javna površina namjenjena isključivo za parkiranje vozila, koju kao takvu odredi nadležna služba.

### **Član 32.**

Opća parkirališta su mjesta na kojima se mogu parkirati putnička motorna vozila, kombi i teretna motorna vozila do 3,5 tone dozvoljene mase.

Posebna parkirališta su mjesta na kojima se mogu parkirati vozila određene kategorije, vrste i namjene.

Rezervisani prostor za parkiranje vozila je onaj prostor koji se rezerviše isključivo za parkiranje od strane pojedinih organa, preduzeća ili drugih pravnih i fizičkih lica.

### **Član 33.**

Općinsko vijeće Kalesija odlukom povjerava Javnom preduzeću „Vodovod i kanalizacija Kalesija“ d.o.o. Kalesija (u daljem tekstu Javno preduzeće) na upravljanje i korištenje javnih površine na kojima se organizuje pružanje usluga parkiranja vozila.

Javna parkirališta mogu biti parkirališta uz naplatu i parkirališta bez naplate.

### **Član 34.**

Nakon prijema javnih parkinga na upravljanje i korištenje Javno preduzeće u skladu sa zakonskim, općinskim i vlastitim aktima organizuje pružanje usluga parkiranja motornih vozila uz naplatu.

### **Član 35.**

Javno preduzeće organizuje naplatu usluga parkiranja vozila, svakim danom osim nedjelje i praznika , u vremenu od 07 sati do 22 sata.

### **Član 36.**

Organizacija naplate javnih parkinga vrši se u dvije zone i to:

#### 1. Zona I -

obuhvata: Ulica Patriotske lige, na ulici otvoreni parking ; Ulica Žrtava genocida u Srebrenici, do skretanja za tržni centar Piemonte: Na ulici otvoreni parking ; na Trgu šehida: Van ulice otvoreni parking ; Ispred objekta Konoba Bosna otvoreni parking ; Zgrada MUP-a i Medžlisa otvoreni parking ; Parking Lovački dom – BKC ; Ispred zgrade supermarket, Ul. Oslobođilaca Kalesija ; Na ulici otvoreni parking ; Ulica Senada Požegića od Doma zdravlja Kalesija do kraja Ulice Senada Požegića ; Parking oko gradske pijace ; Parking kod zgrade stadiona FK „Bosna“ Kalesija; Parking kod zgrade „Tehnograd“

#### 2. Zona II -

obuhvata: Ulica Žrtava genocida u Srebrenici, do skretanja za tržni centar Piemonte do kraja ulice: Na ulici otvoreni parking ; ispred hotela Košuta i zanatskog centra Na

ulici otvoreni parking ; ispred objekta iza zgrade Supermarket, na ruševnim zgradama, otvoreni parking ; Ispred objekta Konoba Bosna na ruševnim zgradama, otvoreni parking ; Iza zgrade Općinskog suda na ulici otvoreni parking; Parking ispred zgrade „Bijeljinka“, ispred “Porezne ispostave Kalesija i ispred „NLB banke“ ; Parking ispred zgrade „Bijeljinka“ ( do malog parka) ; Parking ispred zgrade „Tuzlanka“ ; Parking kod semafora, do zgrade „Socijalka“

### **Član 37.**

Cijene usluga parkiranja motornih vozila utvrđuju se prema zonama, pri čemu cijene predlaže Uprava javnog preduzeća, a na prijedlog općinskog načelnika usvaja Općinsko vijeće.

### **Član 38.**

Javna parkirališta na kojima se naplaćuju usluge parkiranja moraju biti propisno obilježena i imaju na vidnom mjestu istaknuto obavještenje koje sadrži: zonu, vrijeme naplate i kategorije motornih vozila koja se mogu parkirati na tim parkiralištima.

### **Član 39.**

Javno preduzeće dužno je na svakom javnom parkiralištu uz naplatu osigurati namijenjen parking prostor za parkiranje vozila za invalidna lica. Parking prostor iz stava 1. ovog člana namijenjen je za vozila koja posjeduju međunarodni znak “Znak za pristupačnost” samo uz prisutnost nosioca tog prava i kada je vidno istaknut.

### **Član 40.**

Na javnom parkiralištu sa naplatom broj rezervisanih parking mjesta ne smije preći procenat od 60% od ukupnog broja parkirnih mjesta u toj ulici.

### **Član 41.**

Javno preduzeće će obezbijediti odgovarajući broj parkinga namijenjenih za zakup i rezervaciju za stanare i privredne subjekte. Zakup parkinga sa rezervacijom može se izvršiti na period od godinu ili mjesec dana.

### **Član 42.**

Parking mjesta sa rezervacijom obilježavaju se horizontalnom saobraćajnom signalizacijom uz naznaku slova „R“ ( rezervisano ) i odgovarajućeg serijskog broja.

### **Član 43.**

Javno preduzeće pružanjem usluga parkiranja ne vrši čuvanje vozila i ne odgovara za bilo kakav oblik oštećenja koji može nastati na vozilima koja su parkirana na javnim parkinzima kao i za slučajeve otuđenja vozila.

### **Član 44.**

Vozač ne smije da zaustavi ili parkira vozilo:

1. na raskrsnici i na razdaljini manjoj od pet metara od najbliže ivice poprečnog kolovoza,

2. na mjestu na kojem bi vozilo zaklanjalo postavljeni saobraćajni znak ili uređaj za davanje svjetlosnih saobraćajnih znakova,
3. na dijelu kolovoza koji je kao stajalište za vozila javnog saobraćaja obilježeno saobraćajnim znakom i oznakama na kolovozu,
4. prolazima i ulazima škola, ustanova, preduzeća, stambenih zgrada i drugih objekata i iznad priključka na vodovodnu mrežu i ulaza u kanalizacionu ili drugu mrežu komunalnih organizacija,
5. mjestu na kome bi parkirano vozilo onemogućilo pristup drugom vozilu radi parkiranja ili izlazak nekom već parkiranom vozilu,
6. trotoaru, odnosno na pješačkoj stazi, ako to nije izričito regulisano saobraćajnim znakom, a ako je parkiranje dozvoljeno, mora da se ostavi najmanje 1,6 m širine na površini za kretanje pješaka, s tim što ta površina ne može da bude uz ivicu kolovoza,
7. na kolovozu s dvije saobraćajne trake gdje se saobraćaj odvija u oba smijera,
8. na trgovima i drugim uređenim mjestima za kretanje pješaka,
9. na svim uređenim površinama, parkovima i sl,
10. na parking mjestima sa rezervacijom ukoliko prethodno nije izvršen zakup i
11. na mjestima u neposrednoj blizini kontejnera radi manevrisanja servisnog vozila za odvoz smeća.

## **V - PREMJEŠTANJE NEPROPISNO ZAUSTAVLJENIH I PARKIRANIH VOZILA**

### **Član 45.**

Premještanje nepropisno zaustavljenih ili parkiranih vozila vrši pravno ili fizičko lice koje je za to ovlašteno od strane Ministarstva unutrašnjih poslova Tuzlanskog kantona.

Premještanje vozila koja su parkirana na javnom parkiralištu za naplatu kao i na rezervisanim parking prostorima vrši Javno preduzeće.

### **Član 46.**

Zaustavljena ili parkirana vozila suprotno oznakama na kolovozu ili saobraćajnim znakovima kojim su određeni način i uvjeti parkiranja, kao i vozila koja su bez odobrenja zaustavljena ili parkirana na parking mjestima sa rezervacijom te vozila koja onemogućavaju obavljanje hitnih intervencija uklonit će vlasnik odnosno korisnik vozila po naredbi ovlaštenog službenog lica policije ili Javnog preduzeća bez odlaganja.

### **Član 47.**

Ukoliko vlasnik odnosno korisnik vozila iz člana 45. nije prisutan ili odbija da premjesti vozilo ovlašteno službeno lice Policijske stanice ili ovlašteno lice Javnog preduzeća odredit će premještanje vozila.

U slučajevima kada parkirano vozilo onemogućava sigurno ili nesmetano odvijanje saobraćaja ili kretanje pješaka, kao i zbog potreba održavanja reda i mira ili druge javne priredbe, ovlašteno službeno lice Policijske stanice će dati nalog za premještanje vozila.

U slučajevima kada nije moguće izvršiti premještanje vozila na pogonske točkove vozila se stavljaju uređaji za blokadu pogonskih točkova. Troškovi montaže i demontaže uređaja za blokadu pogonskih točkova padaju na teret vlasnika ili korisnika vozila.

#### **Član 48.**

Ovlašteno lice po čijem nalogu je izvršeno premještanje vozila, sačinjava poseban zapisnik.

U zapisnik iz prethodnog stava unose se podaci o vozilu (registarski broj, marka, tip i dr.), mjesto sa kojeg se vozilo premješta, razlog premještanja, vrijeme kada je počelo premještanje, te zapažanje o vizuelnom pregledu vozila (da li je vozilo zaključano, postoje li vidljiva oštećenja i koja su to i sl.). Sastavni dio zapisnika su i fotografije sačinjene prije premještanja vozila.

#### **Član 49.**

Ako se vlasnik, odnosno korisnik vozila javi u času premještanja (prije podizanja vozila), vozaču će ovlašteno službeno lice izdati prekršajni nalog zbog počinjenog prekršaja uz obavezu korisnika vozila da sam premjesti vozilo bez odlaganja.

#### **Član 50.**

Trošak premještanja vozila pada na teret vlasnika ili korisnika vozila. Pored troškova premještanja vozila, vlasnik, odnosno korisnik vozila snosi troškove čuvanja na mjestu određenom za tu svrhu, od momenta premještanja do momenta preuzimanja vozila.

Čuvanje premještenih vozila do časa preuzimanja vozila od strane vlasnika odnosno korisnika vrši ovlašteno fizičko ili pravno lice.

#### **Član 51.**

Obavještenje o mjestu na koje je vozilo premješteno vlasnik, odnosno korisnik vozila može dobiti u dežurnoj službi ovlaštenog pravnog lica.

#### **Član 52.**

Prilikom preuzimanja vozila sastavlja se zapisnik o primopredaji koji potpisuje vlasnik, odnosno korisnik vozila i lice koje predaje vozilo. Zapisnik sadrži podatke o identitetu vozila i vlasnika, odnosno korisnika vozila i vremenu preuzimanja. Jedan primjerak zapisnika se predaje vlasniku odnosno korisniku vozila.

### **VI - OSPOSOBLJAVANJE KANDIDATA ZA VOZAČE**

#### **Član 53.**

Praktični dio osposobljavanja kandidata-polaznika obuke za vozače motornih vozila nije dozvoljeno na užem gradskom području u vremenu od 06h do 08h i od 14 i 30 h do 16 i 30h.

Poligon za početnu obuku za vježbanje „parkiranja“ i „ulaska u garažu“ i sl. je lociran u Halisijskoj ulici pored Željezničke stanica Kalesija na izgrađenom dijelu parcele novog premjera označene sa k.č. broj 1211/3 KO Kalesija grad. Početna

obuka vožnje za kandidate-polaznike se obavlja prvenstveno na ulicama sa manjom frekvencijom saobraćaja a nastavak obuke na svim ulicama užeg gradskog područja kao i na ostalim saobraćajnicama na području općine, prema planu obuke u skladu sa propisima.

Ulice sa manjom frekvencijom saobraćaja su određene Odlukom o određivanju poligona za polaganje ispita iz upravljanja motornim vozilom i ulica za osposobljavanje vozača motornih vozila iz upravljanja motornim vozilom, („Službeni glasnik općine Kalesija“, broj 8/14) i to su :

- Ulica Kapetana Hajrudina Mešića-Hajre,
- Ulica Halisijska.

## **VII - DJEČIJE IGRE I DRUGE AKTIVNOSTI NA SAOBRAĆAJNICAMA**

### **Član 54.**

Nadležna Policijska stanica, uz prethodno mišljenje nadležne općinske službe određuje u kojim ulicama i u koje vrijeme su dozvoljene dječije igre (klizanje, sankanje, igre sa loptom, vozanje na koturaljkama, romobilu, skateboardu, dječijem biciklu i sl.).

### **Član 55.**

Ulice u kojima su dozvoljene dječije igre moraju biti obilježene saobraćajnim znakom i zabranjene su za saobraćaj vozila u vremenu u kojem su dozvoljene dječije igre.

### **Član 56.**

Sportske, kulturne i druge priredbe i aktivnosti na javnoj cesti, ulici i pješačkoj zoni ne smiju se održavati bez odobrenja nadležne policijske stanice odnosno uz saglasnost nadležne općinske Službe.

## **VIII - POSEBNE MJERE SIGURNOSTI**

### **Član 57.**

Zabranjeno je vršiti prodaju ili izlagati vozilo za prodaju na ulicama, trgovima, trotoarima ili drugim površinama koje su određene za saobraćaj vozila i kretanje pješaka.

Prodaja i izlaganje vozila može se vršiti samo na mjestu određenom za tu svrhu.

### **Član 58.**

Pranje i opravka vozila na ulicama, trotoarima i drugim saobraćajnim površinama je zabranjeno.

Izuzetno, na licu mjesta se mogu vršiti nužne opravke na vozilu nastale u toku vožnje, samo ako se kvar na drugi način ne može otkloniti, pod uvjetom da se time ne ometa uredno i sigurno odvijanje saobraćaja.

### **Član 59.**

Ako se dio kolovoza ili trotoara ne može koristiti za saobraćaj vozila ili pješaka zbog privremene opasnosti (obrušavanja sa zgrade, skidanje snijega, radovi i sl.),

izvođač radova dužan je da postavi propisane saobraćajne znakove na oba kraja tog prostora.

#### **Član 60.**

Horizontalne kolovozne oznake na saobraćajnicama, autobusnim i taxi stajalištima moraju se obnavljati najmanje dva puta godišnje, i to prvi put najkasnije do 20. aprila, a drugi put najkasnije do 15. septembra u toku godine.

#### **Član 61.**

Postavljanje, održavanje i kontrolu saobraćajnih znakova, oznaka na kolovozima i druge opreme za regulisanje saobraćaja vrši Služba za civilnu zaštitu, komunalne poslove i vatrogastvo Općine Kalesija i Policijska uprava Kalesija, svako iz svoje nadležnosti.

### **IX - KOMISIJA ZA SIGURNOST SAOBRAĆAJA**

#### **Član 62.**

Radi unapređenja saobraćaja u općini Kalesija, saobraćajno-preventivne aktivnosti i ostvarivanja koordinacije svih organa i organizacija koje obavljaju djelatnosti i bave se pitanjima saobraćaja, obrazuje se Komisija za sigurnost saobraćaja (u daljem tekstu Komisija).

#### **Član 63.**

Komisiju iz člana 61. imenuje Općinski načelnik iz reda stručnjaka iz oblasti značajnih za sigurnost saobraćaja (drumski saobraćaj, motori i drumska vozila, sigurnost i stručnjaci za bezbjednost), te državnih tijela i organizacija i ista broji pet članova.

#### **Član 64.**

Komisija iz člana 62. ima sljedeće obaveze:

1. da razmatra pitanja i daje prijedloge za rješavanje saobraćaja u općini Kalesija,
2. da radi na unapređenju saobraćajnog odgoja i osposobljavanja mladih za učestvovanje u saobraćaju,
3. da radi na unapređenju propagandnog i informativnog djelovanja prema učesnicima u saobraćaju,
4. da radi na poticanju razvoja službe pomoći i informisanja na cestama,
5. da radi na provođenju i koordinaciji preventivnih aktivnosti na cestama i vozilima,
6. da ostvaruje saradnju i koordinaciju sa tijelima i organizacijama koje djeluju u oblasti saobraćaja,
7. da razmatra i daje mišljenje na nacрте zakona i drugih propisa kojima se utvrđuju pitanja od značaja za unapređenje saobraćaja,
8. da daje mišljenje na prijedlog za tehničko uređenje saobraćajnica i postavljanje saobraćajne signalizacije,
9. da predlaže konkretne mjere za regulisanje saobraćaja u naseljenim mjestima,
10. da daje mišljenje za određivanje i uređivanje parkirališta,
11. da daje mišljenje u vezi sa rješavanjem problema javnog saobraćaja i prijevoza putnika i

12. da radi i ostvaruje saradnju sa udruženjima građana i klubovima koji promovišu tehnička stvaralaštva u oblasti motornih vozila i očuvanje baštine starodobnih vozila na području općine Kalesija (klubovi tehničke kulture, oldtimer klubovi, biciklistički klubovi, klubovi ljubitelja kamiona i sl.)
13. da obavlja i druge poslove koji su od interesa za sigurnost saobraćaja.

## **X – NADZOR**

### **Član 65.**

Nadzor nad provođenjem ove Odluke vršit će nadležna inspekcija Općine Kalesija (putni inspektor i komunalni inspektor), Policijska stanica Kalesija i Kantonalna uprava za inspeksijske poslove u okviru svoje nadležnosti.

## **XI - KAZNENE ODREDBE**

### **Član 66.**

Novčanom kaznom od 500 KM kaznit će se za prekršaj pravno lice ili lice koje obavlja samostalnu privrednu djelatnost, ako:

1. u cestovnom pojasu postavlja znakove, informacije, reklamne panoe, natpise suprotno odredbama člana 10. ove Odluke;
2. ako bez odobrenja suprotno članu 56. organizuju sportske, kulturne i druge priredbe i aktivnosti na javnoj cesti, ulici i pješačkoj zoni;
3. izvodi radove, a nije na odgovarajući način obilježio da se izvode radovi suprotno odredbama člana 59.

Za prekršaje iz prethodnog stava kaznit će se novčanom kaznom od 150 KM odgovorno lice u pravnom licu.

### **Član 67.**

Novčanom kaznom od 100 KM kaznit će se za prekršaj:

1. vozač koji vozi vozilo u zoni koja je označena kao zabrana kretanja suprotno članu 19.;
2. vozač teretnog motornog vozila koji vozi suprotno odredbama člana 20.;
3. vozač motornog vozila koji parkira ili zaustavi vozilo suprotno odredbama člana 21.;
4. vozač koji ostavi oštećeno, dotrajalo ili neregistrovano vozilo na saobraćajnim površinama (član 22.);
5. vozač koji prevozi opasne materije postupajući suprotno članu 24. ove Odluke;
6. vozač autobusa koji vozi suprotno odredbama člana 27. ;
7. vozač vozila koji postupi suprotno odredbama člana 28.;
8. vozač koji odbije da ukloni vozilo na traženje ovlaštenog službenog lica (član 45. i član 46. stav 1.);
9. instruktor koji osposobljava kandidata za vozača suprotno članu 53.;
10. lice koje prodaje vozilo suprotno odredbama člana 57.

### **Član 68.**

Novčanom kaznom od 50 KM kaznit će se na licu mjesta za prekršaj:

1. vozač koji vuče neispravno vozilo suprotno članu 23.;
2. vozač autobusa i taksi prevoznik koji zaustavi vozilo suprotno odredbama

- člana 28.;
3. lice koje parkira vozilo na parkingu namjenjenom za vozila invalidnih lica suprotno članu 39.;
  4. vozač koji postupi suprotno odredbama člana 44;
  5. vozač ili drugo lice koje na kolovozu i trotoaru vrši pranje, opravku vozila (član 58.).

#### **Član 69.**

Novčanom kaznom od 30 KM kaznit će se na licu mjesta za prekršaj:

- 1.lice koje po ulicama i cestama užeg gradskog područja nosi predmete suprotno članu 12.;
- 2.lice koje u dječijim kolicima prevozi djecu kao i lice koje se kreće u invalidskim kolicima ili vozi drugo lice u invalidskim kolicima suprotno članu 13.;
- 3.lice koje upravlja zaprežnim vozilom ili lice koje goni stoku suprotno članu 25.

#### **Član 70.**

Za prekršaj propisa o saobraćaju koji učini maloljetnik kaznit će se novčanom kaznom propisanom za učinjeni prekršaj roditelj, staratelj maloljetnika ako je prekršaj učinjen kao posljedica propuštanja staranja o maloljetniku.

#### **Član 71.**

Novčane kazne naplaćene za prekršaje po ovoj Odluci su prihod Općine Kalesija, a koriste se za finansiranje preventivnih aktivnosti u cestovnom saobraćaju (informativno-propagandna aktivnost, unapređenje saobraćajno-tehničke kulture, edukacija mladih u saobraćaju i dr.).

## **XII - ZAVRŠNE ODREDBE**

#### **Član 72.**

Ova Odluka stupa na snagu danom objavljivanja u „Službenom glasniku Općine Kalesija“.

Bosna i Hercegovina  
Federacija Bosne i Herecegovine  
Tuzlanski kanton  
OPĆINA KALESIJA  
OPĆINSKO VIJEĆE

PREDSJEDAVAJUĆI  
OPĆINSKOG VIJEĆA

---

Damir Džafić, dipl. ecc.

Datum: \_\_\_\_\_

Broj: \_\_\_\_\_

## **O b r a z l o ž e n j e**

Pravni osnov za donošenje Odluke o sigurnosti i organizaciji saobraćaja na području Općine Kalesija sadržan je u članu 2. Zakona o osnovama sigurnosti saobraćaja na putevima u Bosni i Hercegovini („Službeni glasnik BiH“, broj : 6/06, 75/06, 44/07, 84/09 i 48/10-dr zakon, 18/13, 8/17, 89/17, 9/18, 46/23 i 88/23), članovima 8. i 15. Zakona o principima lokalne samouprave u Federaciji Bosne i Hercegovine („Službene novine F BiH“, broj 49/06 i 51/09) i članu 42. Statuta Općine Kalesija („Službeni glasnik Općine Kalesija, broj 10/07, 7/08, 10/11, 3/12 i 6/13).

Imajući u vidu činjenicu da se na području Općine Kalesija sve češće događaju brojne saobraćajne nesreće, većinom uzrokovane nesavjesnim postupanjem građana i nepoštivanjem osnovnih saobraćajnih pravila, Općinski načelnik na prijedlog Službe za civilnu zaštitu, komunalne poslove i vatrogastvo donosi prijedlog Odluke o sigurnosti i organizaciji saobraćaja na području Općine Kalesija, s ciljem da se gore navedeni problemi riješe na što adekvatniji način.

Obrađivač:  
Služba za civilnu zaštitu, komunalne poslove i vatrogastvo

Predlagač:  
Općinski načelnik